

靈巖山人詩集

靈巖山人詩集目錄

第十一卷 古今體詩

青瑣吟香集

柔兆困敦

古意

同馮魯巖光熊趙雲松翼雨中翰遊石磴庵

豐臺芍藥詞四首

鷺峯寺觀旃檀佛像作

天慶宮觀劉鑿塑像

題海月庵吳匏庵讀書處

經東郭草亭遺址

西山紀游詩二十首

出阜城門經門頭村作

由玉泉山至呂公洞

宿臥佛寺夜登五華閣

碧雲寺

香山寺

宿來青軒

曉發洪光寺寄城中諸僚友

狼兒窩

自翠巖庵上中峯庵

清涼寺觀雨

祕魔厓

證果寺

善應寺四松

昌化寺畫壁羅漢

平坡寺

自寶珠洞抵獅雲庵

自滴水厓至大雲寺

仰山樓隱寺

自鶴子山至百花山贈文殊院僧

菩薩厓

雜詩十一首

蓮花庵

作家書得句

中秋旅夜不寐有作

秋怨

促織鳴

秋夜書懷

寄徐大桂門二首

題唐六如畫冊三首

錢丈方壺先生歲寒圖五首

雪夜

靈巖山人詩集卷十一

鎮洋畢沅秋帆

一字
蘊蘅

青瑣吟香集

柔兆困敦

古意

妾有青銅鏡背面雙盤螭攜來懷袖中照此長蛾眉蛾眉
能幾時對鏡良自悲不惜捲簾箔鬢影春風吹君心未可
見妾貌將焉爲

紫羅繡香囊是妾定情物聯以長命縷貫以同心結以我
一寸心充君片時悅轉絲而迴黃微香亦消歇安知佩服
久中道兩決絕

落花戀故枝迴風舞晴昊紛墮玉階前寂寂無人掃惜此
韶華姿零落依百草看花花已殘令妾傷懷抱記得花開
時比似妾顏好

同馮魯巖

光熊

趙雲松

翼

雨中翰遊石磴庵

嘉辰物外游仄路穿林入松破當寺門地高盤石級花徑
春來窄柴扉雨後澀殿深神像尊苑古苔痕濕雲根一重
重遙峯向我揖磬孤羣壑磨窗小衆峯集幽境斷人行陰
巖有龍蟄茶煙菴樹白泉韻因風急澗阿生芝草隨意資
採拾眼前好景光似許我輩給平臺返照來幢影如人立

豐臺芍藥詞四首

豔絕中庭四五叢明妝翠袖倚春風坐來身被紅雲擁知

在蓬萊第幾宮

胡姬十五解當壚，曩暖剛逢試繡襦。
花意不知人斷酒，殷勤故勸玉盤盂。

侵曉風柔紅雨飛，窈娘妝閣啟重扉。
豪情何惜纏頭贈，盡剪朝霞作舞衣。

鬱金裙子內紅衫，婪尾春杯日日銜。
漫說此花能稱意，也防梁燕語喃喃。

鷲峯寺觀旃檀佛像作

幽州古招提，只瞻慧日相。幾經龍漢劫，依然尙無恙。
似現不壞身，來詮秘密藏。千花擁雲龕，九龍盤玉帳。
容光若雪海，晃朗不能望。聞昔目犍連，運神攝巧匠。
三返忉利天，審

諦始營荆坎坎伐檀聲人天悉和暢相具三十二莊嚴絕
依傍仗茲接引手拯溺迷津上皓月臨太空萬川皆一狀
視爲身外身所見卽孟浪文殊本無二焉用辨真妄試參
光明經一空生滅障八難暨三塗種種可尊尙我擬謝塵
羈初地早回向買取鷺溪絹繪此勝鬘樣石堂梅萬株香
火長供養非徒煩惱除兼得壽無量海山潮音中松雲一
鶴放

天慶宮觀劉鑿塑像

北方塑設技最工阿泥哥與劉元同惟鑿成佛亦妙手遺
像尙留天慶宮入門肅容兩道士啟鑰導我廊之東三間
配殿制輪奐靈衣羽扇瞻仙容有元及今五百載黍離板

蕩一再逢土偶豈有金石固歷劫不受兵燹攻依然髣髴質
獨完好豈非呵護邀神功當年絕藝稱祕監歲月雖遠精
神通道園別有正奉記是鑿非元寧相蒙君不見陵川集
語可証誤四賢祠內先有劉鑾塑

或疑鑾與元音相近而誤考郝陵川集燕四賢祠有劉鑾塑傳是鑾

別是一人著名在正奉
先析津日記辨之甚詳

題海月庵吳匏庵讀書處

蓬島紆仙客門臨太液東書摹玉局叟畫折石田翁大雅
東吳冠高名北斗同翻書當永夕想剔燭花紅

經東郭草亭遺址

亭爲明興濟
伯楊善別業

樹掩朱門翠島西風流袞屐幾招攜而今落日輕煙裏苦
菜花香燕子低

西山紀游詩二十首

出阜城門經門頭村作

游山如食蔗咀含先自尾佳境正無涯俱由平淡始久聞
西山西磅礴數千里逞秀復爭奇壺嶠依稀是爰賃下澤
車齋糧試涖止負郭蟠綫徑沙平岡邈迤行行抵煙村石
橋通澗水柴扉架樹成板屋綠厓起酒幔稻場前茶具瓜
棚底一幅幽風圖風物便堪喜勝處能引人賈勇整鞭弭
由來神奧區亦招好奇士山靈早已知暗與相料理松吹
灑我襟谿聲洗我耳頓令肺腑中清虛絕渣滓遙峯千髻
鬢招我綠雲裏

由玉泉山寺至呂公洞

歷盡峴曲途始抵清涼境怪形老檜盤妙思奇峯逞巖仄
寺偏平泉喧門愈靜五鳳綴珠幢雙螭擎石鼎芸館春長
在琳宮晝倍永杖斲蒼筤根尊劖紫穉瘦澗確擣霜稔春
鷗摘煙茗琪花無定光玉螻不遺影傳聞呂公洞近在青
龍嶺散策試游目撥雲還引領山來列仙居迴別浮華景
雲霞衣上生日月足底騁瓊林不知夜瑤剛難計頃顛蒙
有至願封事將上請茅屋便經營塵緣悉退屏相從物外
游控鶴萬松頂

宿臥佛寺夜登五華閣

羣壑殷鐘聲客到水晶域松門如畫圖返景增寂歷挂壁
泉韻幽無風旛影直空庭兩杪攤亭亭各千尺修幹走怒

蛟煙屯一殿黑其下四五片孱顏皺縹碧疑是太古雲落
此凍爲石花龕坐金身畢世恒偃息未必津梁疲示人休
物役流盼殿西齋千峯在几席從僧飯伊蒲迴異塵寰食
遙聞梵唄音鸚林知向夕乘興更出游扶筇恣所適登頓
躡危梯飛閣俯鵬翼暝煙白茫茫冷月光相逼大千世界
中化成銀海色

碧雲寺

五峯至碧雲春山幾眉黛石徑夾松杉嵐翠遙相礙引我
到招提清磬一而再谿流圍寺門琤淙響環佩白日委波
上滉瀟金鱗碎小憩踞雲根笑語水聲內紺宇何巍峩諸
天粉壁續閃閃繡旛中佛與一鐙對樹老作蚪形僧高無

世態同登藏經樓低首看鳥背羣山如蒼龍一氣走邊塞
渾河互其前拗怒未肯退指點話穹碑隧道始明代可惜
名勝區乃瘞權奸輩寺後卽魏忠賢墓萬言頌勲德腥穢人難耐太
息出門去殿角鼓初搥

香山寺

夜眠鹿苑牀曉稅蘭皋駕出山泉聲送入山鐘聲逐紅亭
閒白塔隔鳴露精舍門徑何幽脩深澗虹梁跨山茶四五
株力盡已半卸一一紫蝴蝶翻飛度風榭苔磴盤千級朱
欄峯頂架人從樹杪行回望始驚怕削壁若無路一綫通
石罅禪房兩三楹陰厰與檐亞東有老藤蟠西有飛流瀉
終朝未脫雲萬古不知夏擬便謝簪纓苦未畢婚嫁薄寒

雲庄卜言卷之一
衣袂生圓景鳥邊下上方猶白晝下界已昏夜嶺半石廊
鐙竹榻從僧借

宿來青軒

朱欄十二曲結構蒼山腳上壓縹緲峯下臨瀕洞壑織織
月墮空淦淦雲侵閣春鐙冷不紅急起垂簾箔掃榻投孤
枕游倦睡易著長風習習來吹夢向寥廓手挽五彩虹足
跨千年鶴相隨瑤嶠人共赴玉峯約萬樹碧桃花四月猶
未落光豔聚爲霞化作芙蓉幕文茵錦重重金鼎香漠漠
絲繩提玉壺醪醑賭千酌雲翹彩鸞輩彈弦復鼓箏進我
崑崙觴唱我游仙作聊謝人間世永博天上樂朦朧忽自
驚檐角一聲鐸

曉發洪光寺寄城中諸僚友

銀河猶在天東海已分曉仄徑歷坡陀露光溥碧草板橋
橫澗陰殘星帶林杪微煙薄靄中一一見棲鳥翹首望寺
門岩巖出雲表經堂聞梵放潮音落窾窾九磴十八盤夾
道松杉遶賈勇凌絕頂忽訝衆山小東向見

帝京旭日初杲杲宮闕耀金銀瑞煙霏縹緲清漏度龍樓
百花明鳳沼斯時十洲仙雍容集瑤島還因憶故人異境
恣搜討乃知軒冕榮未及煙霞老歸隱卽未能乞身會須
早他日卜幽棲白雲何處掃

狼兒窩

石工俱於
此采石

潺潺雲壘水春至碧於澗千山一夜雨奔流激飛箭衝磴

復轉碕萬萬明珠濺兩厓
悉翠珉光瑩類鏡面石工日開
鑿高下斧痕徧所售究無多
百錢卽數片豪家因廣求到
處飾庭院遂令碧山雲質美
而用賤我擬告世人使材貴
擇善何不加裁成徵取充琴
薦花竹高齋裏俾得娛清宴
否則細磨礪治爲龍尾硯磷
緇兩無虞持贈玉堂彥校書
天祿閣作賦金華殿斯言誰
肯從欲行仍眷眷旁觀不我
知謂是臨淵羨

自翠巖庵上中峯庵

我入翠巖庵卓立萬竿竹
陰陰濃似雲娟娟淨于玉
常疑殿宇秋只覺天地綠
銅鼎慧香凝甌鑑春茗熟
堪羨物外僧獨擅閒中福
坐聞清磬聲泠泠殷巖腹
知別有招提窟

窈藏雲木爰出香積厨曲徑遵蒼麓山深氣候殊四月春
猶伏滿地躑躅花半開紅未足周牆十里餘全憑白石築
檜柏青蔥間詎料多華屋拾級陟飛梯凭欄聊縱目下顧
乍來處鳥道千盤曲蒼蒼暮靄中行人小如鷺興盡且他
之空樓讓雲宿

清涼寺觀雨

在盧
師山

深山深復深開闢此淨土巖岫旣岬嶒花竹復和煦卷幔
坐高齋支頤望平楚石鱗白煙生初惟綫一縷凌空聚作
雲瀾漫徧區宇長風勢欲來隱軫如鼙鼓金蛇閃閃行銀
竹森森豎檐端霹靂飛厓半蛟龍舞階除走奔湍軒楹集
萬弩巒障恐崩頽松栝時仰俯當頭疑有神對面難聞語

暗欲上紅燈涼思添白紵驟雨不崇朝雲消日停午只恐
去路遙山橋水應阻老僧畱我宿西廳啟雙戶深夜紙窗
明殘月東嶺吐

祕魔厓

層巒矗太空日車費轉折下插幾千仞絕壁凹復凸漠漠
秀土花賊黑類積鐵鳥飛不到處猶凝上古雪巖半見石
扉金鎖緊扁鐻傳聞有禪師于此閉妖蠶朱書數梵字迄
今未磨滅往往風雨時似聞聲批振東向青龍潭碧水至
激潔上覆古柏雙翠色若可擲臨厓試一窺陰森氣凜冽
擬以小石投僧驚爲橋舌搖首速勸止往事向予說昔有
人犯之晴空飛列缺山林悉震摧十日雨不歇我聞心悚

然急揖與僧別

證果寺

前卽青龍潭
後有祕魔崖

老僧指示予鳥道挂煙徑禪室頗清幽最擅茲山勝爰策
白藤杖彎環陟蘿磴巖腹天容窄石脣地面正一堂小若
龕四壁光如鏡似來離垢天非由汛掃淨古洞蛇俱靈千
年樹亦聖峯峻無來禽雲深不散磬境佳情易移佛慈心
愈敬聞佩悟禪機拈花見本性密諦儻從參三生應可證
澗道流泉鳴巖扉斜照映玉茗烹竹鑪霜杭出柳甌飯罷
偶閒行復起攀援興絕頂聊送目空翠色無定罡風浩浩
來一笑四山應

善應寺四松

伽藍西嶺北臺殿勢巍峩蒼翠塞滿庭奇松盡矮嬌一株
倚石壇傾欹身半禪榻然臆空腔云曾經劫火虬枝蔭石
寮綠影一窗可一株立亭亭散作雲數朶紫藤故相趁條
幹受纏裹雖抱凌霄心拘牽仍未果顧影臨清池一株獨
婀娜宛若明鏡中翠釵初貼妥標格推絕羣昔爾今亦頗
一株抱幽石盤挈拗而左徧體蒼龍鱗節目最磊砢露根
數丈餘可供橫琴坐流覽幾摩挲欲去情無那白雲忽飛
來無心閑似我

昌化寺畫壁羅漢

相傳爲吳
小仙筆

峯巒互蔽遮遙望若無寺綠谿半里餘始見布金地竹柏
團晨光冷聚一庭翠上殿瞻金容旃旒檀氣兩壁駭奇

觀何人逞絕藝續出諸應真形像特古異疊嶂排青冥洪
濤振海溢石斷林迴閒煙雲復靉靄或面壁不言或拈花
示意或乘蘆一枝彼岸渺無際或飛錫厓端運法伏魑魅
或結接引緣廣現陀羅臂行住坐臥者各各參奧義龍女
持珠回鴿王捧鉢至非通最上乘難闢此真諦安得如斯
人與論六已字

平坡寺

截嶽翠微山層層戴雲構一磴一紅亭無窗無碧岫厓根
石特奇儼伏雙怪獸相對目眈眈含怒勢欲鬥古栢根倒
垂酷類老蛟瘦探爪爭攫拏儼欲將赴救下有煙蘿垂暗
泉滴深竇幾疊至幽澗然後成奔溜經堂枕其上崇朝鳴

玉漱我來卷疏簾于此坐清晝峯巒旣崢嶸松竹復濃茂
日色冷而青當午始一逗山僧指謂予東閣最奇秀高板
走長廊危檻逼辰宿渾河一綫盤恒嶽小盆覆興盡歸去
來殘雲滿襟袖

自寶珠洞抵獅雲庵

距寺一里餘乃抵寶珠洞厥石瑩而黑形狀等臥甕初進
路傾仄未免心驚恐側行數十步豁達敞虹棟斜光忽透
入仰見天一縫鐘乳筍下垂泉韻琴爭美削壁擘窠書錯
落題名衆挾蘚細辨認日月紀唐宋滑澁不受屐滿地白
雲凍境寒難久留捫苔覓來空一路松風迎一路松風送
又值祇樹園敲門驚鶴夢庭際疊雲根玲瓏殆天縱老僧

無世情分我伊蒲供經堂許借宿孤鐙與佛共隔簾數綵
筵離襪立青鳳

自滴水厓至大雲寺

峯形互蔽虧日色遞現隱沙隨風並旋雲帶巖將隕樹根
破路出厓角向人很雨過泉爭流卻遭亂石窘曲折赴谷
口一瀉莫能忍下射百丈潭水花白于粉浮梁架空澗欲
度恐難穩風鈴聲琅璫知去初地近仰首望林表臺閣飛
欄楯似非人世間首夏春未盡娟娟野草花到處紅不實
境高無鳥雀地暖多芝菌煙霞所鬱蒸物候罕憑準平瓦
構殿高削壁盤廊緊薜碣脫龜趺風箏落鴟吻坐深邱壑
情知被松雲引

仰山棲隱寺

苔痕蝕雲龕松色冷月硤一徑十餘里長風兩崖夾欲前
游興猛再上足力乏且喜近精藍數杵鐘鞮鞞峯迴偶翹
首縹緲現層塔迎客來枯禪延進紫虛閣軒楹旣清幽石
林仍匝匝古畫列圍屏素琴橫短榻銅匱篆煙凝玉鉢山
花插坐論倒籛書閒試烹茶法勸我急回向早脫恒沙劫
浮生等幻泡得道趁慧業心知事所難頗與鄙心洽示我
格體詩險韻獨能押紀游擬屬和含豪開硯匣詩情何處
生庭梧聲颯颯

自鶴子山至百花山贈文殊院僧

左臨萬丈谿右插千尋巖緣岡曲折行架木成長棧碧草

忽茸茸喜得見平阪重板磴百級呀然露厓巖遙疑不可
入門塞翠嵐滿及近卻全無且憩凌虛館泉作水簾垂石
成芝蓋偃松間雲有香洞裏日偏短陟險更探奇荒途通
鹿苑知隔幾重花鐘聲出來緩樹古寺門幽筍多陽嶠暖
齋餘下檐禽客到叩茶版自愧非淵明爾應是慧遠發難
論三塗質疑拈四本理足神方怡境佳慮自散何年海嶽
庵一榻從吾嬾

菩薩厓

山禽啁嚅鳴竹窗天已曙起別寺僧行側側踏沙路袂衣
襲冷風兩履濡清露紅日上崖頂千林始開霧忽見峭壁
間法相現無數不知鑿何年宛若神工塑或慈或怪惡種

種形容具一獸特猙獰遙瞻心尙懼偶爾作飯依未必迷
津度古槐類游龍拔地挾餘怒崩崖欲相壓枯藤緊纏住
似此卽畫圖頗得天然趣計游已浹旬殊覺愜情憐可惜
難久畱又別名山去他時足自豪所到有題句相貽後來
人畱在雲深處

雜詩十一首

食方丈於前不過一鸞肉甲第連青雲所居僅容足本分
自有限安知奢我欲坐歎朱顏改行愁白日速讀書與博
籒等是亡所牧不如黃初平高臥空山谷

雲來雨冥冥雲去日杲杲適去而適來先時詎能料學步
既匪工效贖亦難好誰令君多念沈憂坐將老天天園中

桃纂纂桑下棗氣稟根陰陽應候多遲早悠悠待化工
仔修以爲寶

圓月逗前浦清輝滿君除千里遙相望爲君開素書素書
日已滅相望日已虛微風吹霜氣君意其何如

悠悠西林下日夕寒蟬鳴曲水抱晏景前山當戶橫蘭皋
歇芳茵遠渚帶秋城霽心晚煙迴恬目餘霞明眇來澹未
慮睇往生遙情鐘磬自發響松杉月初生

杳杳日西頽漫漫路多阨獨行爲誰思追憶秋風客翩翩
張季鷹悵望吳淞隔無心戀簪纓願托烟波宅以官易葺
鱸歸帆曳輕碧

長川有超越小草亦秀發淡爾玉露零紛茲朝華歇宛彼

清風來馳情太華
闕思欲理瑤楫
放溜下南陌
搗我謝朓
詩搔首問明月

夜靜萬籟息
羣動歸其真
真境卽幻境
如鏡龜埃塵
明月從東來
照我頭上巾
清風自搖曳
澹沱河之濔
蕭蕭鳳尾竹
渺渺魚鱗雲
獨散萬古意
閒垂一溪綸

清露下皋蘭
素風發微霜
零落從此始
俛仰懷悲傷
驅車出門去
曠野莽茫茫
良辰在何許
揮袂凌虛翔

繁華有憔悴
清潔存精神
信道守詩書
舉手謝時人
揮袂撫長劍
高行懷微身
咄嗟行至老
悽愴懷酸辛

柴桑古遺民
長嘯返巖谷
東皋有嘉禾
南山有茅屋
披雲朝出岍
帶月夜歸讀
得性不知疲
幽賞紛在目
野芳綠可

採泉美清可掬茂樹延晚涼早田候秋熟畢景有餘興撫
琴看修竹悠悠千載中此樂君所獨

修竹映茅屋簷簷垂清溪中有太古人忘情學鳧鷖從容
棄人事宛轉和天倪行藥到石壁安步扶筇藜高蹤渺銀
漢逸翮凌丹梯豈伊景行暮懼爲塵網迷

蓮花庵

尋花聊散步杖策向林芴竹籠僧挑茶塵龕佛守鐙閑庭
雙白鶴老屋一青藤薜碣迷人代摩挲意轉騰

作家書得句

欲語真千萬臨書意轉慵愁多辭未達郵速墨難濃于役
縈慈念日歸滯客蹤還將珍重意仔細看題封

雲屏山ノ言身先十一
三
中秋旅夜不寐有作

客憑闌北角月轉屋西頭
急柝報更盡涼雲如水流
苔階蟲切切風磴竹修修
旅夜本無寐况逢山館秋

秋怨

珠斗斜窺翠幔低殘星幾點各東西
杏梁去燕空憐別玉砌寒螿不忍啼
斷夢無聊花慘淡清愁如許月淒迷
新涼處處催刀尺多恐秋風度白隄

促織鳴

促織鳴淒淒切切聲復聲
銀河無影天宇清月落未落時
三更玉闌金井露華明
小庭人定秋意生
蘭闥寂寞挑孤檠
簾垂銀蒜押水晶
欲織迴文寄遠行
金梭在手淚縱橫

促織促織織不成嗟爾天涯之人兮又誰知此時此際難
爲情

秋夜書懷

人隨落葉向長安酒淺愁深繡袂單蟋蟀古苔空館靜芙
蓉斜月小樓寒鄉情似被秋風引客夢全忘行路難何日
扁舟賦歸去碧湖煙水一漁竿

寄徐大桂門二首

總角論羔雉親承綠綺琴聞雞曾對舞立馬悵分襟獨灑
黃金淚同鑄白玉心相思不相見涼月滿風林
屈指江南北相知定幾人烏衣寶冑舊銀管玉臺新花月
飛三雅江山塾一巾垂竿釣磯上也得展經綸

題唐六如畫冊三首

晨雨過青山煙鬢靜如拭童子開柴門放入瀟湘色
落日在前村疎林寒鳥集野航不見人森森寒流急
藤纏松勢曲石礙水流分萬古不知暑四鄰都是雲

錢丈方壺先生歲寒圖五首

良友舊傳三益新圖快覩雙清此福幾人消受看之我亦
移情

寂寂幽扉兩扇迢迢古路三义天意欲雪未雪老梅將花
未花

索帶鹿裘被體旁人道是啟期借問天寒風雪先生策杖
安之

歲晚務閒時候掩關節物勿勿領畧此中清景前賢只有
坡公

布置紙窗木榻經營雪殘花箋如此江鄉光景十年一夢
依然

雪夜

入夜沈沈散落霏街頭宵柝悄無聲狐裘逼火吹無力兔
月窺窗影倍明蓬牖人家園土銼紙窗夜氣逼瑤京蒼涼
一片梅花夢伴得清吟到五更

泰州門人陳燮編校

靈巖山人詩集卷十一

靈巖山人詩集卷十一

五

靈巖山人詩集目錄

第十二卷

青瑣吟香集

強園赤奮若

晚過玉竦橋二首

畫蘭

無題二首

述德抒情呈春和公相一百韻

三月

夏五謁汪冢宰松泉

由敦

先生于澂懷園謹呈

四首

答友人惠茗

欲把二首

過清河橋作

渡白河

宿雲縣

曉行穆家谷作

九松山歌

題攬勝軒壁

要亭

古北口

過青石梁

葦谷嶺

灤江

灤陽客舍讀書偶作

消夏詩四首同紀曉嵐

昉

錢辛楣兩庶常作

遊廣仁嶺諸勝處

夏日游廣安寺題寄京師諸同志

偶游東嶺見小松一株特奇移植瓦盆繫之以

詩

西谷遇雨因過碧峯寺

望筆架山戲作長句

入厓口

興安大嶺歌

木蘭行圍卽景十首

出鹿柴門

題仇十洲篋篋圖四首

雨夜

今夕

遲家書不至月夜有作

祀竈謠

靈巖山人詩集卷十二

鎮洋畢沅秋帆一字續蘅

青瑣吟香集

強園赤奮若

晚過玉竦橋二首

璚華積雪舞回颺樓閣參差倚絳霄總爲玉京得地早春
光先已到長條

花外搖鞭虹影長蓬瀛宛在水中央自憐未抱封侯骨無
意驅車問紫光

畫蘭

冰紈寫叢蘭寒泉繞幽蕊此是王者香所以淡如水美人

不可作遙情寄澧沚

無題二首

有心皆玉琢無語不神傷
隻日遲青鳥三絲怨紫皇
嫩寒憐倚竹好夢欲扶牀
不斷清溪水緣愁箇許長
風遂去無已離亭黯欲傷
藻思工恂悅好事動倉皇
鶴降憐珠樹鸞飛戀女牀
心心畏芳草愁傍夕陽長

述德抒情呈春和公相一百韻

帝賚生良弼調元相業昌
乾符快建極泰運佐當陽
慶協勲華上功高日月旁
儀型標五嶽法象應三光
熙績扶元化鷹期答

聖王相門隆富范威里豔金張
珠角神姿異華躋世澤長

傳經依鶴籙拜職珥貂璫粉署推平叔清班數辟疆便繁
依畫省親切近雲閭宣室螭頭迴甘泉豹尾揚奎星儲輔
弼卿月擢賢良職掌司喉舌絲綸奉廟廊三臺榮曳履八
座重提綱武庫諮能遠山公啟獨倡洪樞參翊贊密勿藉
匡襄玉鉉行調鼎金川忽沸螭威弧遙控矢太白夜捎芒
雪嶺途遐阻蜂窠勢決搶掃除資上策簡馭必非常推轂
勛賢重臨軒

錫命詳提師趨虎穴間道走羊腸賈勇空堅銳徒行挽勁
強神兵真貴連天斧更誰當聚米青油幕衝鋒鐵補襠行
間招季布燾下斬無傷銅具空來嚇礮樓互屹望連營排
控鶴銜弩射封狼完卵猶思粥偷生早引艤何煩擒孟獲

旋已縛零羌傳箭通巴夔迎師送酒漿矜全恢

帝德存活撫蠻荒不戰功逾大招攜計本臧錫饒驚赫奕
幢旆靜張皇劍外花初發關中柳未黃生祠畱俎豆郊勞
叶笙簧入蔡還裴令平蠻相武鄉勒銘威震遠攬鏡字成
祥遂歷三司貴兼榮五服章朱門森列戟紫闕護文韁鐵
券河山誓彤弓秬鬯將玉墀頻退讓寶冊照焜煌在藻歌
魚樂棲鳥慶鳳翔碧城雲路迴金掌露華灑

溫語邀三接

天書拜十行常餐傳祕省獨對上披香起草關機密精思
論慨慷訐謨陳國是風雨協時康敷政持寬大先憂切悚
惶領班崇鵠立參乘冠龍驤秋色黃金勒春風翠羽航經

綸宣德意廷陞喜廣殿中土歸鴻化西人尙犷狂星源驚
燧鑄月窟掃櫓槍邊事時方亟

宵衣日未遑一心籌武幄萬里踐戎場旁午橫飛羽先庚
計峙糧神謨邀契合衆議失倉忙諸將徒軒輊元勲詎頡
頰虎符揮定遠龍笛唱平涼善後機宜協安邊布置彰蕭
關無夜警蔥嶺撤秋防優議酬庸典隆勛冊府藏秩加五
等命宴錫萬年觴功首歸蕭相謀深服鬼方三庭陳玉馬
一統固金湯公望如山斗

君恩更減汪小侯分宿衛歸妹托

天潢出入銅龍署翩躚寄瑣邸平陽初降鶴蕭史快乘鳳
綠野新營聖親賢舊表坊東華開甲第西淀賜雲莊翠壑

仙人館珠扉玉女牀三山連綺島四庫滿芸緇大厦塞多
庇天家飯不忘長筵迎燕喜問夜聽鸞鏘春到花如雪朝
回月似霜軸釣持自重鈴鼓撒何妨履盛恩逾下心精斷
獨剛表忠會賜筮對命欲循牆植體侔庭檜虛衷比谷管
靈襟冰皎潔雅度海洋夾袋宏延覽平衡妙絜量殷勤
逢吐握決擇到粃糠刻鵠微名愧登龍素願償鳳池波灑
灑鼇禁玉瑯瑤草檄頻磨盾簪豪慣裘裝平津開繡閣基
聖藝蒼筤知遇師元獻單寒拔宋庠幸叨陶鑄力遂令姓
名芳絳帳陪絲管黃衫侍袞裳拜恩書鄭重銜感意傍徨
五福綿禧茂三槐集慶穰聲名垂竹帛開譽重圭璋師保
欽公旦星雲翼聖唐春融紅藥院裾拂紫金堂淑景回朝

野元風扇赤蒼斗擎天八極柱鎮地中央茅土封恂禹丹
青繪魏房紫光功第一治定紀珠囊

三月

游絲空際裏悠揚三月時光倍憶鄉或雨或晴春總好不
寒不煖日初長煙凝庭草含情綠風定欄花稱意香最是
五更鴛囀處紅樓斜月隔垂楊

夏五謁汪冢宰松泉

由敦

先生于澂懷園謹呈四

首

自是神仙宅天然結構工山園書閣綠花隱水亭紅橫石
安茶鼎圍屏畫草蟲松窗枝書地濃翠當簾櫳
最愛披吟處圖書甲石倉泉聲涼小院磴影壓迴廊境靜

心多悟人閒畫倍長博山香已燼漠漠有餘香
畫堂畱綠野雨後獨經行徑滑苔多暈橋危板有聲空巖
傳客語異草帶人名點點紅于玉花飛滿石枰
勝地依蓬島西清退直初雨歸花塢鶴風散石潭魚幽景
真名畫清談卽異書琳琅排鄴架彷彿列仙居

答友人惠茗

林靜裏清吹花深出細泉酒醒青嶂月碁罷夕陽天話雨
神爲往尋詩興亦便多君惠新茗滿眼洞庭煙

欲把二首

欲把鄉心托杜鵑蒼茫雲樹遠于天平蕪千里傷春目何
處芳華不可憐

玉柱金尊次第催
新詞不數賀
方向碧簾倚
遍紅樓月多
恐春風怨落梅

過清河橋作

清曉

鑿初啟花香露未收
雪驄嘶廣陌
玉竦偃長流
絲野方梅
夏平疇正麥
秋自慙才謏
陋橐筆扈

宸游

渡白河

長川羣壑匯
雨後勢奔騰
萬騎隨

鑿輅連艘貫彩繩

繩舟爲浮
橋以濟

浪花吹碶轉
雲葉帶厓崩
觸景

還延佇遙峯疊
數椽

密雲縣

漢時遺愛數張堪
路遇叢祠小駐驂
林外淺青雲一抹
白檀山色似江南

曉行穆家谷作

海天日漸升
山村露未斂
涼吹時襲人
萬綠香冉冉
跋馬轉坡陀
曉色豁重崦
浮嵐遠空濛
濕翠若新染
依稀雞犬聲
人家住厓廣
疆場曲谿園
門巷深篁掩
僻壤知俗淳
獨木爲橋險
未克徧幽探
寸中終不懶
揮鞭趁同儕
葛衣風颭颭
一徑野草花
亂擦黃金點

九松山歌

山雖號九松
小大以萬數
揆厥命名初
前人諒匪誤
昔少

今乃繁條幹鬱煙霧紆威

輦道韞花馳清籟遙遙答梵鐘曲澗但添流水綠縣崖不見夕陽紅山空別有清涼境五月袂衣猶薄冷兩耳惟聞風雨聲滿身盡落龍蛇影傳昔有偃佺食實成神仙儻辦長鑱覓飛節縱不輕舉亦可常延年巖之阿澗之曲結椽亭兮架竹屋何人於此賦閒居一榻綠雲春睡足

題攬勝軒壁

在南天門觀音寺旁

鸚林泉若琴鹿苑草如毯入殿拜聞思鑑煙香菴菴孤鐙罩琉璃古瓶供菡萏兩壁繪諸天一視一破膽妙諦話枯禪小憩凭飛檻雲木互相參海山坐可攬軒外俯晴川風微波澹淡巖花一片浮出水魚爭啖茲行迫星程勝境難

周覽應知索居時回味思椒欖

要亭

行帳初張趁暫閒亭臬勝處且躋攀一痕白走穿城水萬
柔青排出塞山花不知名香觸鼻石偏多竅勢孱顏盤陀
跌坐思尋句衣袂從黏積蘚斑

古北口

幽州之北皆大山重巒疊障排五關古北一口最巉絕不
通車馬通人煙松亭金坡儼相望雕窠槍嶺橫其間口外
風煙十八路兔徑鳥道秋豪嶺邊關大川各墩空極衝通
騎速平漫潮河東來鬻山足金溝中頓鳴濺濺有時水發
到山頂一條雪浪噴噴岍關口谿銜兩崖合日色不到苔

痕殷蒙茸樛葛翳洞穴磊砢巨石橫溪泉碧火巢中笑妖
鳥綠蘿烟杪啼清猿山根蒼鼠出復沒斜陽一線嵌溪灣
其中屈曲僅容足其下不測臨深淵山川形勝乃有此是
豈人力關乎天粵自金元溯唐宋陰風慘淡旌旗斑范陽
自古號重鎮龍屯虎塞羅戈鋌誰歟築城據山頂寧武遺
蹟畱孱顏山高城峻勢陡絕撐霆裂月窺雄邊全收大漠
在掌握直逼碧落窮星躔城北還闕祀楊業道旁行者爲
悲歎將軍戰死非戰罪嗟呀鐵石同心肝三日不食餓僵
立骷髏手挽猶巍然雁門虎口並祠廟炎風朔雪爭誇傳
至今城頭吹觚篋英姿颯爽來塵寰滄桑陵谷成已事山
空月落聞啼鵑鏗錚林木自磨戛迴風颯拉吹弓弦山青

青兮水湜湜英風一歇何時還

過青石梁

出關屢見好林垞于役息息未暫停沙路盤旋隨嶺勢山
田層疊作階形正愁疲馬衝炎日恰喜長岡有小亭一笑
遙峯知底處千尋縹緲插雲青

鞏谷嶺

馳道蟠丹嶂回看飛鳥低嶺雲常詐腹塞雨不成泥多爲
關城隔難教物候齊連朝行犖确只恐馬穿蹶

灤江

澄流四五尺塞外亦名江沙白斜陽岸鷓鴣睡一雙
長隄向渡頭三株五株柳帖帖小帘飄幔亭人賣酒

沙觜帶縣碕蕭蕭葭菼碧澄波不聚魚閒殺釣磯石
綠漲忽平隄千山一夜雨葛衣空自攜六月不成暑

灤陽客舍讀書偶作

匹馬來灤京數椽賃荒店每逢展卷時屏營私自念弱冠
掌絲綸文彩欠華瞻是宜惜寸陰矻矻事鉛槧慧業在勤
劬力田有明驗匪靳燕許名徒倚崆峒劔騷壇任人登文
苑容我占探蹟不妨貪知新豈有厭旣割左國腴復挹屈
宋豔所嗤擁百城書債終年欠

消夏詩四首同紀曉嵐

昉

錢辛楣兩庶當作

關外由來夏亦炎赤雲紅日逼深檐北窗賴有緡書地一
樹枿欄當翠簾

自汲清泉滌硯池客居翻與夏相宜
虛堂靜晝渾無事細補青袍扈從詩

塞上山多早晚涼端居猶著袂衣裳
無花無竹庭仍好雨過蒼苔也自香

招涼寧必仗明珠三尺冰盤浸茗盃
精室垂簾研墨瀋素屏添寫北風圖

遊廣仁嶺諸勝處

林梢明曙曦罨畫見遙岫應是鴻濛時
溼翠凝結就特鍾絕塞奇盡拔扶輿秀
氣勢恣奔騰造物不能囿豈惟巖壑幽
亦且草木茂磴道盤長空芒屨怯踐蹂
藤葛盈掌握蚱蜢上襟袖雨餘苔蘚滑
撒手懼顛踣陟險知幾重白雲落

我後數息造平砭放眼隘宇宙夙昔誇穹窿

吳中山名

所見母

乃陋未克窮端倪安能測廣袤犬牙厓腳交牛角峯頭鬪
小大雲根形于焉驚罕覩龍鍾倚衰翁蝟縮伏困獸胡僧
坐脚踏田父對鋤耨將伸螻屈身欲唳鶴引脰排比畫屏
張團圞瓦鼓覆瑩潔池邊礎雙隻路傍堠縱如馬脫繯閃
若熊避殼遠在灌莽者未暇細尋究北向二三里異境無
心邁寒泉厓罅歎削壁挂丹溜汨汨復泠泠曲折赴巖竇
其下乃靈淵雙檜身側仆枝糾葉葳蕤綠影如幕厚赤燄
吐金烏侵晨止一透云值恒暘時居民致觴豆啖畝必霑
濡往往荷神祐名嶺以廣仁覈實洵匪謬過嶺稍平衍釋
氏結雲構垣牆丹雘塗階屺青珉鬻殿古閱千春樓危礙

列宿步廊軒楯迴斗棋雲霞鏤往來迷咫尺起居惑昏晝
飯鐘卯初撞茶版午餘扣僧解上乘禪佛參無量壽金幢
外國施珠幔前朝繡亭敞愛淹畱池清思盥漱架藤碧螭
蟠庭石蒼鷹瘦寶所異景光靈區殊氣候夏木綠方濃欄
花紅不皺芝蘭足庖廚榛栗備糧糗底用持清齋自堪傳
祕咒古鉢毒龍降單方百病救施食及禽魚畱客猶朋舊
昔聞情久移茲游願克副暝煙四遠生日馭西馳驟到無
晷刻寧來擬秋冬又整衣出松門白月東岡逗

夏日游廣安寺題寄京師諸同志

鹿苑淹畱曉又曛清涼暫得避炎氛簾櫳一磴風前樹臺
榭千山雨後雲地勝景佳忘出塞身閒晝永悵離羣所輸

紅藕花香處茗盃薰鑪劇論文

偶游東嶺見小松一株特奇移植瓦盆繫之以詩
寂歷東嶺東磴道罕人躡探幽偶躋攀觸目忽心駭石罅
挺奇松高未及半拐勢偃似積雲質堅逾積錯蝕枝蚯蚓
結破幹鹿角解儻令產中華兼金莫由買惜爾落邊陲槩
枯隨苦蕒攜鏡掘以歸亟汲涼泉灑無謂瓦盆陋無謂棊
几矮置汝石窗前自有清風擺且待下直時或當早朝罷
邀客共品題蠻箋書小楷

西谷遇雨因過碧峯寺

深谷盡蘼蕪一碧無垓圮散步起躍螽扶筇聽鳴蛩遙岡
形彎環古柏勢勁拔潭影涵空青如鏡新磨刮野花豔不

禁坐視小僮握無端風怒號草木互相戛西北礮車雲半
天濃墨屐扳藤復攝衣登頓投梵刹小憩神稍寧據几美
筆札室虛白自生篁密青堪殺花瓷玉茗嘗蘿磴瑤琴拈
生憎澗戶西竹雞故狡猾沙徑潦難停妄言泥滑滑且待
夜涼歸銀蟾剛二八

望筆架山戲作長句

在波羅河屯

峯以筆架名衆謂由像形我備考厥故見諸大荒經北溟
魚從硯池出豈無筠管如金莖亭亭仙掌擢雲表揮灑所
向能令鬼神泣風雨驚鋪張白地明光錦梁州黑水爲墨
瀋龍跳虎臥波磔成草破楚江秋萬頃先天義與世莫知
放手壓折孝穆珊瑚枝幸值崇巒爲撐住然後佩阿筆神

獲有高枕橫陳時無端巨靈醉酩酊忽向中山喚毛穎偕
往騷壇逞技能賭扛萬斛龍文鼎興來也效班超投顛著
三墳未藉九邱郊荒岑寂誰復冥搜迨至唐天寶李杜事
幽討招來同臨池運用稱懷抱落教五嶽搖橫使千軍掃
心知異尋常未敢相草草皮之高閣藏名山宛若扶桑寄
三島後人含豪尚渺然不識鴻才可挾天每當平章處未
肯引真詮任從海嶽廢書眠脈望弄狡獪盜向人間賣致
令浮夸子渲染西江派矯矯龍鬚竇聞之心不快立地遣
五丁奪歸擲天外扈斑無所庸王右軍古
石筆架名並教移北塞至今
苔蘚侵藤蘿蓋喂鹿谿衍雲蒸霞蔚日夕生光怪玲瓏秀
骨冠人代對之能不心乎愛我惟具袍笏來效米顛拜

入厓口

紆盤一徑石嶮呀瘦馬鈴蹏未敢撾映日遙岡沙似雪著
霜叢樹葉如花行圍野宿俱槍壘出塞書生有箭鞞預料
花前逢舊侶壯游豪概任儂誇

興安大嶺歌

巉巖絕塞盡重嶂秀拔扶輿逞天匠虎踞龍盤疊復拗石
棱厓角森南向相距百里餘蒼翠已在望遙想邱壑奇未
至神先王褭糧侵曉行怒馬恣奔放縈槃沿山麓鳥道絕
依傍峯峯秀鐵花迴出層霄上棄騎力攀躋嶺半稍平曠
藉地微喘息縱日訝殊狀足底白瀾漫雲氣隨風颺大千
世界中忽化無聲浪仰觀顛穹碧入四空日輪卓午景物

和融藤纏林以羃歷泉漱石而琤琮不知幾千載峭壁挂
此枝卷幹紐不榮不瘁百尺蒼皮松北行四五里凜冽多
悲風如何一山內涼煥倏異同芒昧難了了地盡天欲窮
豈是盤古氏未曾至此開鴻濛或云此係仙靈藪恒有怪
物相屯守巖扉澗戶間冰雹大於斗人偶觸犯之飛擲徧
陵阜或云前通委羽山有神蛇身人面銜照於其間又云
北溟環在外厥水魂魄晝猶晦往往扶搖生挾人直墮鯤
鵬背我驚退走雲門西一峯下方上銳形如圭賈勇儻登
覽乾坤可端倪石戶貯祕訣玉版書金泥探得而讀者壽
與日月齊進方數武心怵目迷迷陽傷我屨石角鉤我衣
狼嗥虎嘯蝮虺似憎塵凡質未許卽陟青冥梯回策東

岡去霜葉紅千樹
薜蘿一望平不見行人路
得無太古迄于今
登此山者數我爲初度
爰抽佩刀磨崖題署
乾隆丁丑秋九月靈巖畢沅扈

蹕大獮會游處

木蘭行園卽景十首

芒芒甌脫藏靈境如砥平原難計頃
中盤七曲八曲溪

木蘭

溪河甚小而曲名羊腸河

四抱千層萬層嶺紫邏遙連鹿柴門
孕孳蹠角友

羣屯昔屬諸番旣幕地慕義輸誠獻

至尊

本蒙古地康熙間獻爲開場

永爲

聖代游畋界

肄武年年秋出塞懷柔卽寓橋陸中

謨畧遠超虞夏外

法

祖吾

皇紹壯圖二虞四校備三驅干城才衆爭且兔肅殺時乘
合祭貍晉鼓虞旗虔侍奉鹿驚園逼交騰踊

日角無雙聖且神金髡不二仁兼勇曉日曠曠露草乾禁
麗翠蓋擁千官看城遙設紅雲裏到處能承

聖母歡

行闈處爲
皇太后設看城

二

白翎通籀書名姓憑驗頭鵝誰獲雋

幄殿

頒鮮萬部叨銅匱執熟名王進

蒙古諸王設
幄殿進膳

跪吹尺八奏琵琶

盛世華戎共一家繞座雲峯環作障當筵霜樹豔如霞齊
聲共祝

無疆壽稽首陳詞還拜手惟願

皇輿萬度臨四十九旗慶重九

塞上蒙古共編四十九旗

三

白桿朱英丈二長一人袴褶巡圍場衆從虎圈逐虎出獵
獵風捲黃沙揚人蹲虎立兩相搏得間銀光貫虎齧高揭
亭亭雙手擎如鉤鐵爪空中攫舉來獻獲向

帷宮犒之羊胛酒千鍾共喜桓桓援臂客早標矯矯虎臣

風

右謂虎槍

四

皎皎兒駒稱汗血生成曾未經羈絆調之跨馬與爲羣絡
首竿繩暗牽掣騰身上駒駒怒瞋千揪百擲揚沙塵伏腰

握鬣施銜勒約制無多桀驁馴盤旋不待加鞭筆氣勢昂
昂輕萬里應知

游目契

宸衷此術堪移跡弛士

右謂套駒

五

行營一戲亦習勞力士東西分兩曹短衣窮袴緊纏束不
肯膚撓肯目逃彼軒此輕戲機勢匪特恃強兼運智負嵎
虎餓待張拳毆爵鷁飢遙側翅歛然一撲判低昂勝膺賞
賚負羞藏漫云角觚尋常事深寓時平簡練方

右謂相撲六

備崑明駝高一丈欲乘誰不攀緣上健兒三五矜技能雙
跗曲躡身長往人起人落駝不知但覺背上涼風披著翅
名應儕韓果飛豹號詎輸王彌迅捷遑憂阻垠堦登城緣

棧踰猱攫昇平多士裕鷹揚歡忭萬方同雀躍

右謂七跳駝

番中年少稱善騎距營廿里鞍馭騏遙聞號礮競揮策疾
猶上落非平馳到眼林巒不及靚馬蹶去久塵方逗逐電
應居礮礮先追風當笑扶搖後不須片刻集營前離鋌整
衣跪比肩犒以豚醪稽首謝我

皇福履億萬年

八

十丈穹廬傍幽嶺初更白楛交巡警周遭瓊帳悄無聲惟
見中天孤月影碧草青林露氣滋窮邊早值授衣時矮几
行牀膽

祕敕羔裘重襲涼絲絲曙色纔分鵲未噪幔城已起

黃龍纛霎時拔帳去如風柴煙任裏宵屯竈

木蘭皆掘地爲竈

九

撤獵歸程趁曙星馬馱麇兔有微腥
野花豔絕無名字雲嶂天然展畫屏
縹緲林端露臺殿遙瞻且喜

山莊見還家猶未解弓弣拭几先令排筆硯屢荷
頽鮮

恩遇奇自慚無補

盛明時拙豪漫效長楊賦伐輻聊吟素食詩 十

出鹿柴門

明駝班馬各紛紛前路猶賒日漸曛
積水平沙遙莫辨碧雲青嶂亂難分
風高倏爾迴鴉陣獵罷依然足鹿羣
聖代八紘歸版籍壯圖今不慕終軍

題仇十洲筌篔圖四首

拂地宮衣弱不勝花深入夜醉慵騰銀鐙倚閣春風暝舊
譜傳來自李憑

柔濮繁音大雅羞哀絲脆竹遏雲雷亂邦事事堪亡國冤
爾偏名空國侯

木撥輕籠蜀國絃歌傳昔昔怨師涓升庵仙去風流絕古

器淪亡三百年

楊升庵先生會于蜀中得古箏篋一

哀怨無端蹙翠蛾簷頭皎月麗金波分明一曲公無渡淚
落聲聲喚奈何

雨夜

小閣竹林間心閒境亦閒孤鐙然夜雨好夢入家山秋樹
已無葉行人殊未還晨朝青鏡裏應見鬢毛斑

今夕

今夕知何夕同君話軸邁好游爲客慣知命得天多有露
鶴初警無風池自波開尊翦華燭試聽采芝歌

遲家書不至月夜有作

西風拉雜作勢緊木葉蕭蕭打窗盡風停樹靜月忽來一
片清光遞相引深秋物態經洗磨刻露不受纖豪隱放眼
空明煙水邊舉頭清切嫦娥近涼氣依微度層巘花陰羃
歷搖苔蘚堦前促織鳴向人玉漏沈沈滴空館

祀竈謠

紅燈綠酒青松枝盤列園蔬佐以飴鑪香一炷煙霏微再
拜稽首前致詞終年善惡勞記錄明晨彙報陳天墀自揣

功無過亦細應荷玉皇詢姓字伏乞神君進一言斯人但以詩爲事十年已積三千首勞勞未免風塵走夜夢神君有所述述帝云爾情甚逸勅賜生花一枝筆

陽湖門人洪亮吉編校

靈巖山人詩集卷十二